
EF 6:10-13 : ONS STRYD TEEN DIE DUIWEL [1]

No. E237

Die ware Christelike lewe is 'n felle en lewenslange stryd. Dit gaan om lewe en dood! Of ons dit wil weet of nie, presies dit is wat die Bybel konsekwent leer.

Die vyand is binne ons mure

Wat die stryd veral meedoënloos maak, is feit dat dit nie net te doen het met aanslae van buite af nie, maar dikwels op sy felste woed binne-in die Christen self.

Dis soos 'n geveg om 'n stad. Soos altyd, is die stryd binne die mure beslissend. Solank die inwoners die vyand buite die mure kan hou, of, indien die agressors wel sou inkom, tog die opperhand aan die binnekant kan behou, bly die vyand se aanslae steeds tevergeefs. Maar as die bewoners hiér swig, is alles verby. 'n Vyand wat 'n stad van buite af bombardeer, se enigste doel daarmee is om die inwoners se beheer aan die binnekant af te takel, sodat sy magte aan die binnekant kan oorneem.

Die vyand binne die mure - want jy is helaas met hom reeds binne-in die mure gebore - word deur die Bybel "die vlees", "eie begeertes" of "inwonende sonde" genoem. Hierdie ingebore sondegeneigdheid is 'n skrikwekkende vyand wat nooit opgee en nooit onderskat mag word nie. En die stryd daarteen word op talle maniere in die Skrif beskryf: dis 'n stoeigeveg (hier); 'n boksgeweg; 'n oorlog.

Die vyand se strategieë

Ons vyand nommer een, die vlees, het 'n meedoënlose bondgenoot: die Satan en sy engele. En dis oor hom wat dit hier gaan.

• "*Bose magte*"(12) dui op die heersers van die duisternis, die bose geeste.

"*Liste*" (v.11). Dui op die duisternis slinkse planne (2Kor 2:11) waarmee die Duiwel "die hele wêreld verlei" (Op 12:9).

"*Wêreldheersers van die duisternis van hierdie eeu*" (12, OAV) dui op die feit dat hulle oor die ganse sonde-gevalle wêreld dwarsdeur hierdie bedeling regeer.

Hy (kom ons gebruik die enkelvoud, hoewel ons waarskynlik meer met die demoneryk te doen kry as met Satan self) het oneindig baie slinkse strategieë, maar dis deurgaans daarop gerig om gelowiges se vlees te stimuleer en hulle sodoende tot sonde te verlei (Mk 4:18-19).

• Die Satan se strategieë kan in 2 groepe verdeel word: soms val hy *direk* aan, soms werk hy deur hierdie wêreld, oftewel die God-vyandelike wêreldstelsel.

Dit beteken dat ons kan sê dat 'n persoon wat sê hy is 'n Christen, maar tog gedurig in die stimulasie en waardes van die gevalle wêreld opgaan, wêreldgelykvormig is. En daarmee wys hy "dat hy 'n vyand van God is" (Jk 4:4). Só belangrik is hierdie saak dat oorwinning oor die wêreld 'n merkteken van egte Christenskap is (vgl. Gl 6:14; 1Jh 5:4).

Maar kom ons verstaan dit goed: "Hierdie wêreld" is net 'n front-organisasie vir Satan. "Ons weet ... dat die hele sondige wêreld in die mag van die duiwel is" (1Jh 5:19). Hy is "die owerste van hierdie wêreld" (Jh 12:31; 14:30), "die god van hierdie wêreld" (2Kor 4:4), wat die sondige wêreld lei (Ef 2:2).

Laat ons dit onderstreep: Satan is nie die eienaar van die wêreld nie (Ps 24:1). Maar sedert die sondeval is hy soos 'n plakker wat 'n ander man se stuk grond beset. En só beheer hy die sondegevalle mensheid, oftewel die wêreld.

• Die gelowige het maar één antwoord teen die aanslae van die vyand: die voorskrifte van hierdie verse. Ons moet die volle wapenrusting aantrek om end-uit staande te bly.

Enkele detailopmerkings vauit Grieks

Vers 10: Die werkwoord dui op herhalende of voortgaande handeling.

Voorts is daar twee vertalingsmoontlikhede: *julle moet versterk word* (passief), of *versterk julleself*. Lg. is die waarskynlike.

Dus: *Versterk julleself voortdurend*.

Vers 11: Die opdrag, "trek aan" is in 'n beklemtoonde posisie in die sin. Hier word dus aangedring op besliste en dringende handeling. Nog meer, elke deel van die wapenrusting moet aangetrek word.

"Van God" dui daarop dat Hý dit verskaf.

"Sodat" dui op 'n doel wat blywend is; nie op gevolg nie.

Vers 12: "Worstelstryd" (OAV) dui op 'n stoeigeveg; dus op direkte kontak en slinksheid wat die opponent wil uitoorlê.

Opvallend in hierdie vers is die 5 keer wat Paulus die woord "teen" (Gr: "pros") gebruik. Hy praat nie van speletjies speel nie; hy praat van 'n stryd om lewe en dood teen die duiwel en sy bose magte wat daarop uit is om te vernietig!

Vers 13. "Opneem" (OAV) beklemtoon dat dit gedoen word met die oog op gebruik. Dis 'n tegniese militêre term vir finale voorbereidings net voor 'n geveg begin. Die apostel dring dus aan op besliste en doelbewuste handeling.

Al die werkwoorde in die doelsin is in 'n vorm wat dui op suksésvolle handeling. Die NAV vertaal dus goed: "*sodat julle ... nadat julle die stryd tot die einde toe gevoer het, nog op julle pos kan bly staan.*" Die stryd hou aan tot die bitter einde toe. Tot op die laaste mag nie 'n duim teruggewyk word nie. En aan verloor moet nie eers gedink word nie!

Saamgevat: *Trek sonder verwyf en doelgerig die volle wapenrusting aan wat God vir ons voorsien - met die oog daarop dat julle in staat sal wees om (suksesvol) enduit te bly staan.*

Enkele verdere opmerkings

• Dit word algemeen aanvaar dat 'n Christen nie deur 'n demoon beset kan word nie. Maar sou mens jousef wyd genoeg oopstel, sal die vyand jou vir seker totaal oorrompel. Maar, natuurlik, as jy 'n ware en volwasse Christen is, sal jy sekerlik nie jousef só aan sy heerskappy blootstel nie. Alles in die herskepte hart sal immers daarteen rebelleer. Dis presies soos met die sonde tot die dood toe.

Tog gebeur dit soms dat onervare Christene magteloos in die greep van die bose beland. Dan is dit nodig dat hulle gehelp word.

• Ons verse beklemtoon dat Christenskap nie vir swakkeling is nie. Let op die woorde wat sommer van die begin af opgestapel word: *versterk, krag, sterkte*.

• Die Duiwel val selde openlik aan. Veeleerder kom hy as 'n "engel van die lig" (2Kor 11:14), of as 'n "wolf in skaapklere". Ja, hy "loop rond soos 'n brullende leeu" (1Pt 5:8), maar vermom homself, by wyse van spreke, ewe dikwels as 'n slang (Gen 3:1). Hy "verlei" tot sonde en rebellie en "kla aan" om gehoorsaamheid en vrymoedigheid te inhipeer (Op 12:9-10). Hy bedrieg en belieg om sy doel te bereik.

Voorts gebruik die vyand dikwels mense as lakeie, veral as misleiers. Dis betekenisvol dat Paulus presies dieselfde begrip as hier in v.11 - die woord "listig" - gebruik om die dwaalleraars in Ef 4:14 te beskryf.

Hy gebruik kragte, tekens en wonders (2Ts 2:9-10); hy verblind mense se denke (2Kor 4:4); en hy stel allerlei strikke (1Tm 3:7).

• In hierdie oorlog leef gelowiges op die snykant van 'n mes. Satan sal alles in sy vermoë doen om mense te oortuig dat hy nie bestaan nie. Enersyds gee dit vir hom beweegruimte om sy vuil werk te doen, en andersyds steel dit van Christus se eer deur die oorwinning wat Hy oor Satan behaal het te versluier.

As mense egter wel met sy bestaan rekening begin hou, probeer hy hulle verlei tot 'n gefassineerdheid met hom. Mens vind dit in óf 'n morbiede vrees vir hom, soos vandag steeds in sekere kringe, óf dit manifesteer in 'n duiwel-agter-elke-bos-beheptheid, wat bykans alle sonde en ellende aan demone toeskryf - soos in baie super-geestelike groepe in ons dae. Die punt is dat mense se oë in elke geval van Christus afgetrek word.

J.I. Packer stel dit so: Die Christelike lewe is soos klavier-speel. As jy die verkeerde note druk, misluk jy. Maar jy kan ook misluk deur die regte note op die verkeerde manier te speel - teen die verkeerde tempo of ritme. Voorbeelde van sulke skeefftrekings kan vermenigvuldig word: denke sonder uitlewing; liefde sonder wysheid; liefde vir die waarheid sonder liefde vir mense (of omgekeerd); ywer sonder kennis; regsinnigheid sonder heiligheid; kinderlike geloof, wat in plaas van nugter, naïef is. Ens.

Christus!

• Die kwalifikasie "in die Here" (v.10) herinner dat die krag wat hier ter sprake is, net in lewenseenheid met Christus 'n werklikheid is. Soos 2Kor 1:20 dit stel: al God se beloftes is "ja en amen" in Jesus Christus. Die sleutel is dus geloofstoe-eiening van my lewenseenheid met Jesus Christus en alles wat dit impliseer.

• Die Christen hoef dus nie te vrees oor die uitkoms van hierdie felle oorlog waarin hy gewikkel is nie. God is getrou en sal nie toelaat dat hy bokant sy kragte versoek word nie. Dit beteken nie dat sy verantwoordelikheid en betrokkenheid opgehef is nie; intendeel. Dis immers waaroor die wapenrusting gaan!

Maar, let op, elke deel van die wapenrusting is 'n aspek van ons erfenis in Christus wat ons in die geloof moet omhels en steeds vashou.

• Die Christen se opdrag is keer op keer,

"staan!" (11, 13, 14). Dis soos soldate wat 'n vesting ten alle koste moet hou. Hulle mag nie retireer nie, ook nie voortmarsjeer nie - hulle moet stáán!

Christene gaan nie die vyand soek nie. Dit sou hulle van hul pos wegneem. Dit is presies wat gebeur wanneer naïewe Christene "demone-jagters" word. Gou-gou raak hulle so behep met die vyand, dat hulle oë nie meer op Christus vasgenael is nie. Dis betekenisvol dat Paulus in Filippi eers na "baie dae", toe hy "dit nie langer kon hou nie", die waarsêersgees uit die slavin gedryf het (Hd 16:16-18).

Natuurlik is daar soms konfrontasies met die vyand - wanneer die koninkryke van die duisternis en die lig bots. Dan mag dit nodig raak om demone uit te dryf. En enige Christen moet dit kan hanteer - met die gesag wat spruit uit sy of haar eenheid met die Koning! Maar jy beter dit met die volle wapenrusting aan doen, of jy sluit dalk by die seuns van Skeva aan (Hd 19:13-16)!

Slot

Weliswaar is die uitwerk van die redding waarvan Christus die regsbasis afgehandeld gelê het (Jh 19:30), 'n saak van "vrees en bewing" (Fl 2:12-13), *maar ons veg nie vir oorwinning nie; ons veg vanuit oorwinning!*

Wie wil, wie kan, wie durf by Christus iets byvoeg? Die hart van geestelike oorlogvoering lê daarin dat ons vanuit Sy afgehandelde werk veg en leef.

Nico van der Walt

* Nico v/d Walt onderskryf die historiese, internasionale en reformatoriese 1689 Baptistebelydenis, asook die Belydenis van Sola 5, 'n assosiasie van Godgesentreerde evangeliese gelowiges in Suider-Afrika.

* Subskripsies, adresveranderings, kansellasies en korrespondensie: Postnet Suite No.148, Privaatsak X1, Northcliff, 2115. E: nico.vanderwalt@reformed.org.za Tel. 011 476 2907; 082 848 9396.

* Blogs: www.e-preke.blogspot.com (met skakels na nóg 4 blogs)

* Weekliks word 'n preek soos hierdie wêreldwyd en gratis per e-pos gestuur aan mense wat dit persoonlik aangevra het.

* Geen kopiereg. Dupliseer gerus. Of stuur elektronies verder.

* Preekopnames: E: info@nunide.org.za; T: 012-808 3906